

小方壺齋

小方壺齋

湖山便覽

仁和翟灝著

聖因寺 康熙四十四年○○○聖祖仁皇帝省方幸浙居民欣悅愛戴恭建○行宮於孤山錦帶橋西爲○○駐蹕之所南面聖湖東屏百雉全攬湖山之勝○○○御題正殿額曰澄觀齋內一層曰涵清居進東曰西湖山房更東曰攬勝齋後則因山疊石厯磴而上有泉泓然○○○題曰淳泉雍正五年欽奉○○○世宗憲皇帝諭旨卽其地虔供法王祝頌○○○聖德神功於萬世○○○欽定寺名爲聖因○○○御書門額及澤永湖山額建○○○萬歲樓恭奉○○○聖祖神御俾萬姓衣冠咸欽瞻仰○○○龍幃曠赫懷然有○○○天威咫尺之義焉

行宮 乾隆十六年○○○皇上法○○○祖勤民親奉○○○皇太后鑾輿巡幸江浙○○○駐蹕西湖恭建○行宮於聖因寺西適當孤山正中面臨明聖湖羣山拱衛規制天成○○○御題正殿額曰明湖福地進垂花門殿額曰月波雲岫後爲園自園徑拾級而登直達孤山之頂有亭巍然湖光山色環繞輝映○○○御題曰四照亭亭下脩竹萬竿清陰茂密○○○御題曰竹涼處循曲徑而西喬柯奇石目不給賞雲氣時起步屨間○○○御題曰綠雲徑南爲步廊接崇樓樓俯全湖晴波綺縠搖蕩几牖○○○御題曰瞰碧樓樓下文石爲臺而臨曲沼有泉出崖石間演清漾碧上挹天光○○○御題曰貯月泉泉側叢桂常青花時天香馥郁子纍纍如瑤珠舊志所稱月中桂也○○○御題曰驚香庭庭後傑閣連雲聳峙霄漢○○○御題曰領要閣啓扉而入高館崇閣中植玉蘭數本遠望如瓊枝玉樹○○○御題曰玉蘭館館右山徑逶迤有石壁拱立○○○御題曰繡壁空青其上恭建○○○御碑亭敬摹○○○宸章雲漢昭回煥耀天宇數千年明聖之符實徵於今日云

湖 鄞道元水經注錢塘縣南江側有明聖湖父老傳言湖有金牛古見之神化莫測湖取名焉源出武

林山漢書地理志錢塘有武林山武林水所出也闕駟十三州志云山出錢水東入於海鄺氏謂今無此
 水張君房辨錢塘引十三州記言武林東西漢二水東曰龍源橫過靈隱寺前卽龍溪也西曰錢源其流
 洪大下山二里八十步過橫坑橋入於錢湖蓋錢源之聚溜也湖一名金牛一名明聖而錢乃其本名今
 城西第一門曰錢湖門可驗其實次北第二曰湧金門卽金牛出見之所也第三曰錢塘門蓋自前古以
 來居人築塘以備錢湖之水也劉淵林吳都賦注錢塘武林龍川出其垆可爲龍源龍溪之證太平寰宇
 記錢塘古泉亭有紫水如霞可爲錢源洪大之證然則錢塘云者特以備錢湖水通典引舊錢塘記謂漢
 議曹華信募人築塘能致一斛土者與錢一千故名錢塘其說虛矣自塘之築湖名遂亦增以塘字咸淳
 臨安志但云舊名錢塘湖不知尙有武林水錢水錢湖明聖湖金牛湖及龍川錢源諸名在矣西湖之稱
 始見於唐人別集吳志孫皓傳言皓爲烏程侯遣就國西湖民景養相皓當大貴此當是別一西湖何也
 西湖以在縣西得名漢魏時錢塘治在武林山下湖未負其西不應預有此名也自唐以還湖名時復別
 立長慶中白居易作石函以洩湖水由是有石函湖之稱其水之東北輸者時人以爲下湖由是有上湖
 之稱宋天禧中王欽若請以全湖爲放生所由是有放生池之稱元祐中蘇軾築隄湖中截湖爲二由是
 有裏湖外湖之稱蘇有若把西湖比西子句由是有西子湖之稱明孫一元本李白與尙書郎張謂泛西
 川南湖因改郎官湖故事由是有高士湖之稱說者以古樂府西陵松柏下爲指錢塘西湖達祖有船向
 西陵佳處放句由是有西陵之稱西陵一作西泠由是有西泠之稱以上諸名今惟以供詞人灑體之用
 而世所通稱則羣謂之西湖焉耳蘇公守杭守潁皆有西湖後謫惠州亦有西湖楊萬里嘗有詩云三處
 西湖一色秋錢塘汝潁及羅浮東坡元是西湖長不到羅浮那得休近王暉作西湖考臚天下之以西湖
 名者凡三十有一而求其山水之秀麗則未有如杭者故杭之西湖特著稱焉舊志言西湖故與江通引

酈氏水經注及駱賓王樓觀滄海日門對浙江潮楊巨源曾過靈隱江邊寺獨宿東樓看海門一詩爲據
又言西湖大佛石爲秦皇纜船所湖本通海東至沙河塘向南一帶皆大江也故秦皇泛海艤舟於此田
汝成西湖遊覽志謂其不然毛先舒尤力辨之云西湖南稍近江尙有慈雲萬松二大嶺隔之古必無相
通理竊謂唐時詩人或卽眺望所及言之誠不得爲實據在秦時則難以遠斷也湖南重岡複嶺大段形
勢不隨陵谷變遷在湖東則難以臆測也漢立縣治於靈隱山下豈舍平土而弗居哉華信築防海大塘
去縣東只一里彼時縣東今縣西也故張氏以錢塘門爲漢人築塘備錢湖處則江海與湖至漢始隔秦
皇纜船容有之矣隋時移縣築城胥山猶在江口湖之去江仍未甚遠唐白居易築隄捍湖見新唐書本
傳今稱白公隄者乃其捍禦江水所也錢氏有國復於郡城東北築大小二堰隔絕江水不放入城見蘇
軾請開湖狀堰在天宗門外去湖僅二里許其旁曰泛洋湖古江水泛溢地也自此東北十八里有詔息
湖水經注謂秦皇巡狩所憩然則江湖之通舊在東北自詔息經泛洋至白公築隄處其蹟可歷歷識詔
息與纜船二事尤合符節永可竟斥前人爲無稽也隋築杭城時居民猶苦鹵飲唐刺史李泌引湖水入
城爲六井易鹹爲甘民甚利之白居易築捍湖隄作石函鍾洩其水溉田千頃自爲石記歲久浚治不時
湖或堙塞吳越錢王乃置撩湖兵士千人宋大中祥符初郡守王濟增置斗門以白公舊記刻石天禧四
年湖爲放生池禁民採捕姦豪乘之往往陰擁爲利慶厯初守鄭戡發屬縣丁夫數萬盡闢豪族僧坊所
占仁宗嘉獎仍詔本郡歲治如戡法元祐時積葑成田湖面堙塞過半守蘇軾上言湖之不可廢者五取
葑積湖以爲長隄募人種菱湖中歲入其利以備修治自是湖面大展紹興建都知府張澄請置廂軍兵
士委錢塘縣尉兼領其事專一浚湖其後若湯鵬舉之增置板閘若周淙之禁止圍佃若張杓之遏抑豪
右若趙與憲之疏引水道若潛說友之修葺隄岸勤水利者歷世多有終宋之世湖無壅淤元代守令治

湖者無人故元史河渠志不及西湖時民多鬪割湖址以爲桑田明初籍之遂起額稅向稱際山爲岸至是而去山甚遠矣景泰七年尙書孫原貞始建議修築二閘繼是都御史劉敷御史吳元文等咸有題請而浮議蜂起有力者百計阻之成宏間郡守胡濬稍闢外湖布政使甯良創開水門御史謝秉中清理續占吳一貫修築石堰前作後承漸見功緒正德三年郡守楊孟瑛銳情恢復力排羣議言於御史車梁上疏請之以爲西湖當開者五部議報可遂發帑役丁斥毀田蕩三千四百餘畝除豁額糧九百三十餘石有明開浚之功惟斯爲最嘉靖時禁侵占者有御史傅鳳翔龐尙鵬而豪奪陰占紛紛不息漸至砂磧築塞葑草彌望郡人陳善縣令沈匡濟雖先後建議疏通皆徒託諸空言而已○○皇清肇興卽大興水利順治十一年六月○○詔該督撫責地方官修築隄防以時蓄洩西湖景象自此更新康熙二十八年己巳○○聖祖仁皇帝省方至浙駐蹕西湖○○御製詩序諄諄以開湖溉田築隄瀦水爲務閱己卯癸未乙酉丁亥之歲屢次○○巡幸官民踴躍忭舞恭先濬治西湖并疏湧金門城河以達○○御舫○○聖恩汪濊至今與湖波沾沐靡涯○○世宗憲皇帝特因西湖水利切繫民生○○勅令工部查議行該省確勘具題總督覺羅滿保巡撫黃叔琳請將從前民占田蕩四百四十餘畝依照舊址清出應徵糧米准其豁除淤淺沙灘三千一百二十餘畝疏濬深潔以暢湖流舊隄埤損之處卽將所挑沙草幫築裏湖各橋建閘啟閉不使浮土再入湖內奉○○旨允行乃令鹽驛副使王鈞經理其役工程銀四萬有奇王鈞乞奏捐助四年工竣舊志稱湖周三十里至此清查實存二十二里四分爲時稍久又有爲小民占作田蕩并淤淺成灘者二里有奇乾隆辛未○○天子法行巡狩大典臨幸西湖丁丑壬午○○再幸舉凡利益生民之事無一不厪○○聖懷大沛恩澤咨悉仁和海甯一帶田畝必藉湖水灌溉○○特諭守臣除已墾熟外不許再行侵占巡撫楊廷璋遵奉丈勘逐段清立標記以有礙水道之地蕩沙灘一里有

奇開挖歸湖已成田者概溥○○皇恩免其創廢按畝徵租歸歲修項仍於湧金門一天山長橋湖山神廟四岸立石永禁繪圖存案每冬令地方官按圖勘驗由是惠澤滂敷下游農田仰藉充給年穀順成民物殷阜湖山景色更覺粲然改觀士庶歌詠太平優游化日咸謂有湖以來未有如今日之盛者也

山 漢書地理志錢塘縣下惟載武林一山武林卽靈隱也水經注云浙江東逕靈隱山山在四山之中有高崖洞穴山下有錢唐故縣蓋漢時縣治在此山下山爲一縣主山故獨載焉吳越備史引郭璞地志云天目山無兩乳長龍飛鳳舞到錢塘錢塘諸山皆祖自天目而發脈於武林餘山復自武林分支此又漢志獨載意也夏時正杭州府志以靈隱後山北高峰爲武林邵重生本宋釋契嵩之意作武林山辨云武林乃天竺靈隱諸峰之祖名東晉以後遞有靈隱天竺飛來北高及蓮華月桂白雲乳竇楊梅龍門諸名而武林反以無專指而晦夏氏以屬北高峰非也嗣後志地家多從其說夏氏說固局而未廣然北高峰旁之天門山實承天目遠脈而爲湖上南北兩山之宗合漢書獨載之意不爲無見邵氏推而廣之轉覺偏曲蓋由其說則漢志但有北山而無南山卽北山近東之寶雲巨石諸山亦缺而未該矣田汝成遊覽志云天目西去府治一百七十里蜿蜒東來若翔若舞萃於錢唐而嶢萃於天竺從此而南而東則爲龍井爲大慈爲玉岑爲積慶爲南屏爲龍爲鳳爲吳皆謂之南山從此而北而東則爲靈隱爲仙姑爲履泰爲寶雲爲巨石皆謂之北山兩山之脈各分數道入城而南山外邏則自龍山沿江而東露骨於茅山艮山北山外邏自霍山繞湖墅衝武林門露骨於城內武林山皆其護沙也此雖不以論武林而武林山之全體必如是始爲能盡之耳唐元和郡縣志錢唐有靈隱界石二山靈隱則武林矣界石今不復聞據陶翰垂潮至漁浦詩云樟亭忽已隱界峰未及覩釋皎然有界石守風望天竺靈隱二寺詩其山當江湖之間似卽今龍鳳諸山祖名綜而論之漢時凡錢唐之山統名武林六朝謂之靈隱唐以靈隱屬北路諸

山別稱南路山爲界石五代兩宋漸有南屏玉岑大慈靈石龍鳳等名而界石以無專指而晦亦猶靈隱天竺諸名立而武林晦也諸山聯絡周匝凝結渾厚豁泉千道縷注爲湖若層萼之涵露若交龍之護珠山影水光黛碧互映○○○聖祖仁皇帝五次巡方○○○皇上先後幸浙又已三次○○○宸遊之宮○○○天章之亭璀璨照耀峰巒若增而益高岡阜若培而益大山祇嶽靈呈奇獻秀清淑之氣宣著發越一草一木俱有欣欣向榮景色猶是山也而太平極盛之象非前此之徒詡繁華者敢比擬矣

六井 潛說友咸淳臨安志唐刺史李泌以郡城水泉惡引湖水以便民汲開六井一曰相國井在甘泉坊側一曰西井亦名化成井在安國羅漢寺前其水口在李相國祠前一曰方井俗呼四眼井在三省激賞酒庫西一曰小方井俗呼六眼井在錢唐門內裴府前其水口在菩提寺前一曰白龜池其水不堪飲止可防虞水口在玉蓮堂北一曰金牛井廢以上凡瀦而汲者爲井導而入者爲水口六井皆在城內應皆有導入之所而志載水口僅三白龜則壞爲濁池金牛竟至全廢蓋李侯故蹟在此時已不能悉討矣繼李而治井者長慶時白居易旣築堤捍湖復濬六井宋嘉祐中知州沈遵作南井於美俗坊以補金牛之缺入稱沈公井熙甯中知州陳襄重爲潔治且遷方井少西蘇軾爲倅詳記其事刻石相國井亭上及元祐中出守南井已壞乃更爲規畫用瓦筒石槽以易竹管并他井皆致力焉乾道安撫周淙倣蘇遺法重修諸井時舊記已漫漶復鑿石刻之且自爲記附其後淳祐安撫趙與憲清理水口咸淳安撫潛說友修復石箭治井之事自此而止元明以來言水利者不聞復及於井○國朝承平日久休養生息仰水之眾倍於昔時而杭城隨處鑿井皆得甘泉蓋古者江與城近捍禦偶忽鹹水每每奔溢入城而民患斥鹵今○○○列聖相承江海効順○○○皇上復以塘工重務親巡海甸咨度精詳金隄百里隔越鹹水永不侵城是以輸匯得宜靈液湛溢晨烹夕溉人人飲和雖不屑屑於六井而井養自不窮也

十景 祝穆方輿勝覽云西湖山川秀發四時畫舫遨遊歌鼓之聲不絕好事者嘗命十題有曰平湖秋月蘇隄春曉斷橋殘雪雷峰落照南屏晚鐘麴院荷風花港觀魚柳浪聞鶯三潭印月兩峰插雲此西湖十景見於地志之始考凡四字景目例起畫家景皆先畫而後命意祝穆與馬遠僧若芬同爲宋甯宗時人遠嘗有水墨西湖十景冊畫不滿幅入稱馬一角見南宋畫苑錄若芬畫之傳世者有西湖景圖十見繪事備考祝氏所載或因遠與若芬畫冊言之非謂西湖之勝盡此而無遺也嗣是錢唐陳清波馬麟輩又爲十景寫圖同時王洧題以十詩陳允平題十詞十景之目遂以傳稱至今祝氏以平湖秋月爲首夏時湖山勝概記稱平湖秋水又二人皆以雷峰西照爲落照程希堯文園漫語則稱雷壇夕照班惟志題馬麟畫冊以雙峰插雲爲兩峰插漢毛良無聲詩爲兩峰出雲又以斷橋殘雪爲孤山梅雪康熙三十八年○○○聖祖仁皇帝親瀝宸翰改正參錯有司勒石建亭萬目瞻仰十景之定次定名垂千古而無易矣元末又嘗有錢唐十景見高得陽凌雲翰兩詩集及郎瑛七修類稿目曰六橋煙柳九里雲松靈石樵歌冷泉後嘯葛嶺朝瞰西湖夜月孤山霽雪兩峰白雲北關夜市浙江秋濤西湖本名錢唐湖錢唐云者亦猶云西湖也雍正間總督李衛濬治兩湖繕修勝蹟復增西湖一十八景目曰湖山春社功德崇坊玉帶晴虹海霞西爽梅林歸鵲魚沼秋蓉蓮池松舍寶石鳳亭亭灣騎射蕉石鳴琴玉泉魚躍鳳嶺松濤湖心平眺吳山大觀天竺香市雲棲梵徑韜光觀海西溪探梅今蒙○○○聖駕屢幸湖山之靈爭妍競秀名區勝境更有不止於是者已

孤山路 白沙隄 孤山 蘇

白沙隄 一名孤山路路口爲斷橋有斷橋殘雪亭 舊有總宜園擬碧園秦樓垂露亭 西爲錦帶橋又西爲平湖秋月亭 舊有

望湖亭嘉亭北有蓮池庵陸宣公祠吟香別業 舊有處士橋學士溝 自秋月亭繞孤山而西有照膽臺朱文公祠更

澤龍王廟 方壺香輿也 湖山便覽四 九百七十三 南清河王氏鑄版

西北爲西林橋

舊有葉廣居宅巢雲居又相傳有蘇小墓

白沙隄在孤山下潛氏臨安志引舊志云不知所從始自斷橋池

邇至西泠橋徑三里餘唐稱白沙隄宋稱孤山路今俗謂之白公隄據白樂天詩誰開湖寺西南路草綠

裙腰一道斜曰誰開則非白公自開明甚唐人或去白字單稱沙隄樂天詩十里沙隄明月中是也近人

或去沙字單稱白隄不考者因與樂天姓合遂誤爲白公隄歲久隄削明萬厯間司禮孫隆鑿石鋪沙羅

樹花木更名十錦塘○國朝雍正二年○詔興西湖水利濬湖中葺草運於各舊隄上加廣丈餘高二

尺餘隄上桃柳芙蓉俱視昔有加 斷橋在孤山路口唐張祐孤山寺詩斷橋荒蘚合時已有斷橋之稱

宋名寶祐橋元錢惟善竹枝詞有阿姨近住段家橋句聞者以爲杜撰然張翥詩段橋春水綠初柔楊維

禎詩段家橋頭猩色酒王洧題十景斷橋殘雪亦以斷爲段周密武林舊事直云一名段家橋未嘗無所

證也李公西湖志據吳禮之長橋月短橋月詞謂斷橋亦可稱短橋 斷橋殘雪亭在斷橋北宋陳清波

有斷橋殘雪圖康熙三十八年○○○聖祖仁皇帝御書四字爲西湖十景之一四十一年有司勒石建

亭於此 錦帶橋舊有涵碧橋在斷橋西宋轉運使陳堯佐重建碑紀其事且爲之圖久圯明孫隆修十

錦塘卽遺址架木爲梁易今名○國朝康熙間復鑿以石 平湖秋月亭在孤山路康熙三十八年○○

○聖祖御書四字爲十景之一勒石建亭前爲高臺旁構重軒曲欄畫檻直挹波際 蓮池庵雍正五年

浙撫李公衛以馬公祠改建尼庵仍祀嘉澤龍王像以存舊蹟旁有白蓮池增修十八景謂之蓮池松舍

陸宣公祠祀唐宣公陸贄明嘉靖間少保陸炳購中書舍人洪澄別業改建在孤山之陽隆慶間巡按

御史謝廷傑卽祠祀嚴光以下十一人而徙公像於祠前之恩綸閣顏其額曰西湖書院天啟間毀天下

私創書院仍改正爲祠○國朝雍正九年重修尋移蓮池庵東乾隆十六年○○○皇上御題內相經綸扁

額 吟香別業在陸宣公祠後亦名勾留處○國朝范忠貞公承謨以浙撫陞任福建總督去浙時取白

樂天句書勾留處二字於湖心亭尋公死耿逆之難浙人哀思於孤山路建祠崇祀康熙二十八年移字
懸祠前亭上亭臨方池公子時崇爲福浙總督悉栽荷池中周繚石垣臨池增建水閣輔以舫齋環以曲
廊左構重樓後起高軒遂成湖上勝地初公嘗於盛夏過湖堤適荷花盛開觸事行吟得絕句十首邦人
刻石於此因稱吟香別業垣後卽忠貞公祠 照瞻臺在聖因寺東堤上祀漢關壯繆明萬歷時郡紳金
學曾建其子季直嘗集諸善友共結慈社於此前有三義閣後有清嘯亭亭後山坡卽宋志所謂瑪瑙坡
也向貯玉印一兩面有文一曰漢壽亭侯印一爲神諱相傳神所故佩 朱文公祠在○行宮西隄上明
嘉靖間督學秦梁謂公提舉浙東多遺澤裔孫在浙者無以展敬建祠北山錦塢祀之額曰紫陽書院○
國朝順治丁酉公裔孫以錦塢山峻易圯請於官移建今處 西林橋孤山路西北盡處橋也遊覽志云
一名西泠一名西陵武林舊事云西林橋又名西村都城探春水面畫機如鱗次第先南後北至午則盡
入西村橋弁陽老人詞云看畫船盡入西村閒卻半湖春色蓋寶錄也齊東野語云趙孟堅客武林曾嘗
蒞節買舟西湖薄暮入西泠橋艤櫂茂樹間指林麓最幽處曰此眞董北苑得意筆也

孤山巔爲歲寒巖

舊有四照閣歲寒亭

陰爲後湖爲林處士隱居有巢居閣放鶴亭和靖墓四賢祠

舊有水亭梅亭和靖祠高菊祠

墓宋藏

東爲瑪瑙坡

舊有寶勝院西開闢

西爲六一泉有數峰閣

舊有報恩院東坡庵山陽舊有廣化寺有辟支塔柏堂竹閣僧錄房金沙井

又智果院有參寥泉南宋併諸刹爲延祥觀爲西太乙宮宮觀有涼堂漏嶼小蓬萊閣香月亭挹翠堂等
蹟又前人亭館有賈亭楊公濟莊易從山亭梅隱水竹居梅花嶼大雅堂孤山草堂今恭建○行宮於此
諸舊蹟不能
詳考所在

孤山湖中一嶼孤立旁無聯附亦名孤嶼童嗣杲西湖百詠引云唐宋時樓閣參差彌布

椒麓山背皆花圃南渡建延祥觀獨留和靖一墓餘屋皆徙宋釋若芬元林若拙俱有孤山圖趙孟堅有

孤山夜雪圖明李流芳有孤山夜月圖

歲寒巖山巔石壁陡絕蒼蘚剝蝕中隱見篆書歲寒巖三大字

下疏郭令公歷中書二十四考廣成子住空同萬八千年二十字相傳爲蘇長公題其上平夷四曠可眺

全湖乃舊四照閣址

後湖卽裏湖近北一節以值孤山之後隨地異名

林處士隱居處士名逋字君

復隱居孤山種梅參鶴自適二十年足不及城市眞宗賜粟帛詔長吏歲時勞問既沒仁宗賜諡和靖先生君復雖在隱逸名譽盛一時范仲淹贈詩曰巢由不願仕堯舜豈遺人又曰風俗因君厚文章到老醇

梅堯臣序其詩謂其談道則孔孟語文則韓李趨向博遠直寄適於詩耳歐陽修謂自逋之卒湖山寂寥

無有繼者其推重如此 巢居閣林君復自構山閣也歲久圯元儒學提舉余謙李祁先後重建祁自爲

記略云其下雲樹四合羣枝紛拏而斯閣巋然獨出眞有若巢之寄乎木末者時閣在山之巔故云明成化間左布政甯良等移建三賢祠右○國朝因葺放鶴亭還卽舊址重建 放鶴亭在巢居閣前林君復

嘗蓄一鶴字曰鳴皋自泛小艇遊西湖諸寺客至則一童子應門延坐開籠放鶴必掉船而歸蓋以鶴飛

爲度山多古梅相傳君復手植時人因有子鶴妻梅之說元提舉余謙旣構梅亭郡人陳子安以梅鶴不

可偏舉乃持一鶴放之復構鶴亭其側歲久圯明嘉靖間錢塘令王鉞重建曰放鶴亭○國朝康熙十二

年巡撫范公承謨榜曰林君復放鶴處三十五年恭奉○○○聖祖御書放鶴扁額並舞鶴賦一幅勒石

亭上 和靖墓在放鶴亭北南宋建延祥觀盡徙孤山諸剎獨此墓詔存咸淳間金華王庭題和靖先生

墓五字刻石墓前元僧楊璉眞伽盜發之棺中惟遺一玉簪時人有生前不繫黃金帶死後空餘白玉簪

句至元間余謙重爲葺治 四賢祠在孤山東椒祀唐刺史李泌白居易蘇軾處士林逋先是孤山

有三賢堂卽竹閣旁地爲之南宋堂廢像一徙於寶石再徙於蘇隄三徙於城內西湖書院至明天順間

郡守胡濬始復徙孤山所祀仍祇三賢成化間參政張寰建仰高亭於堂外正德間郡守楊孟瑛以鄴侯

增祀遂稱四賢祠祠左爲敬一書院前爲范忠貞祠 瑪瑙坡在孤山東地有碎石如瑪瑙狀人或採之

以鑄圖篆明萬厯間金學曾建關帝殿於坡前薙除草礫得大瑪瑙石以其紋理形似號之曰梅花石坡

之舊蹟遂因以表證焉事見曾鳳儀孤山慈社記

六一泉在孤山西麓蘇長公出判杭州六一居士歐

陽修謂曰孤山僧惠勤甚文長於詩吾昔爲山中樂三章贈之子閒於民事求人而不可得則往從勤乎

長公至杭三日訪勤於孤山勤言此邦之人以歐陽公未嘗一來爲恨公麾斥八極其神何所不至故吾

謂西湖蓋公几案間一物耳長公領之踰年六一居士薨會哭勤舍又十八年長公再來守郡則勤亦化

去矣其弟子畫六一及勤像祀之前是數月有泉出講堂下未名長公遂本勤舊語名曰六一且勒銘泉

上南渡院徙泉屬延祥園改泉上舊石室爲亭梁柱皆以太湖石爲之前更爲堂理宗御書飛白六一泉

三大字額焉元以其地爲帝師祠未幾廢泉銘爲他僧舍昇去明初僧行昇圖復舊觀徐一夔爲作疏事

未克成泉遂隱翳榛莽成化間夏時正訪得而濬發之○國初卽泉上建表忠祠揭六一泉三字爲門額

其地在北宋時屬報恩院舊志以爲廣化院誤 數峰閣一名表忠祠在六一泉明嘉隆間泉爲冢宰茅

瓚別業鼎革之際瓚孫嘉捐地與樞關陳調元建閣祀甲申死事倪元璐凌義渠周鳳翔施邦耀吳麟徵

陳良謨六人旁更爲先覺堂祀歷代鄉先達

蘇公隄六橋自南而北第一橋有花港觀魚亭定香橋舊有先賢堂旌德觀第二橋西爲花塢舊有湖山堂三賢堂第三橋有

蘇隄春曉樓其下爲花港舊有懷山臺第四橋舊有水仙王廟薦菊亭雪江第五橋舊有松窗第六橋有曲院風荷

亭崇文書院秋水觀竹素園湖山神廟舊有西湖書院煙水蘇公隄宋元祐間蘇公軾既奏開西湖卽

取葑泥積湖中自南訖北爲長隄以通行者夾植花柳中爲六橋公自賦詩云我在錢塘拓湖渌大隄土

女爭昌丰六橋橫絕天漢上北山始與南山通忽驚二十五萬丈老葑席捲蒼煙空此詩史也後守林希

榜曰蘇公隄邦人祀公隄上甚者至不泛舉蘇字專稱公隄公送李友諒歸錢塘詩公隄不改作姥嶺行

當新趙次公注云公隄乃先生所築杭人以此稱之是也自隄之築湖分爲兩人謂其東曰外湖西曰裏

湖山便覽六

小方壺齋叢書也叢少

九百七十五 南清河王氏讀版

湖後十年郡守呂惠卿奏毀之南渡後重新沿隄設九亭舊橋難達大舟改二高橋時因呼曰新隄并呼其南隄曰南新路北隄曰北新路咸淳五年初命安撫潛說友增築高闊且新其九亭油壁青驄往來最盛歷元暨明漸復廉削正德初知府楊孟瑛濬取葑泥補益隄面列插楊柳稍復舊觀○國朝雍正二年與白沙隄同時修築五年同植花木由是十里長虹煥成雲錦 映波橋蘇隄南路第一橋也與西岸楊隄第六橋斜對港通赤山教場臨安志載映波鎖瀾等名自注云以上止據京城小說蓋諸名乃南渡後好事者所擬非蘇公自立故宋元詩詞集中皆未經用及之者但云第一第二而已徐集孫湖西納涼詩小艇撐過第一橋 定香橋在花港觀魚亭前一名袁公橋袁詔建先賢堂時並建武林梵志云赤山埠側定香橋乃江干行旅必由之路 花港觀魚亭在蘇隄一橋二橋之間亭後有高軒康熙三十八年○○聖祖御書四字爲十景之一恭摹勒石於此 鎖瀾橋卽蘇隄第二橋與西岸第五橋對通赤山麥嶺路錢宰看梅圖詩花落西冷第二橋 花塢袁詔請建三賢堂疏云訪得廢花塢一所當蘇隄之中前挹平湖氣象清曠背負長林岡樾深窈窕築基建堂且闢大達以與蘇隄連貫又程璠記云隄西百步宿號花塢後壠爲屏前峰如幕據二文塢當在三橋之西蓋花家山下花港經流所也 望山橋卽蘇隄第三橋與西岸第四橋斜對通花家山遊覽志餘云三橋近出尊榮不下湘湖蔡襄西湖晚歸詩酒到三橋月滿身 花港源自花家山出蘇隄第三橋下所謂花港觀魚是也今景亭在一橋二橋之間非其舊址蘇隄春曉樓在第三橋南康熙三十八年○○聖祖御書蘇隄春曉爲十景之首建亭勒石雍正八年以亭隘未稱觀瞻改建岑樓復構曙霞亭於樓後 壓隄橋卽蘇隄第四橋與西岸第三橋對通茅家步港臨安志云橋下水極深凡入靈竺舟行必取道於此劉渙憶舊詩重到桃花第四橋 東浦橋卽蘇隄第五橋與西岸第二橋對通麴院港周紫芝韓園讌集詩遙知第五橋邊路桐葉題詩人未歸 跨虹橋

卽蘇隄第六橋與西岸第一橋斜對通耿家步港稍北則爲西林橋矣陳孚湖隄感舊詩東風第六橋邊柳不見黃鸝見杜鵑曲院風荷亭宋魏院在金沙江西北其地多荷舊稱魏院荷風今景亭在蘇隄第六橋旁名實不稱康熙三十八年○○○聖祖御書十景改魏院爲曲院易荷風爲風荷恭摹勒石亭上東建迎薰閣望春樓西爲複道重廊摹欽○○○南巡所賜諸臣墨寶崇文書院在第六橋西明萬厯間巡鹽御史葉永盛集士子課文於此授以題命各就舫屬文花洲鷺渚聽其所之少焉畫角一聲羣舫畢集各以文進名曰舫課尋就地建書院○國朝康熙四十四年○○○聖祖御題正學闡教四字爲額有司更鼎新之秋水觀在第六橋左宋賈似道別墅也統名水竹院落有理宗御書奎文之閣閣下爲堂曰秋水觀度宗御書三字賜焉又有道院舫亭忠烈亭梅塢諸勝時人稱遊覽之最元張雨嘗居觀中鄭元祐詩相府尙餘秋水觀酒旗多挂夕陽樓張炎詞更關情秋水人家斜照西陵皆謂此明萬厯十五年改關壯繆祠俗呼一橋廟時武林高應科著西湖便覽一書其敘六橋自北而南故以此爲第一橋然俗又呼其地曰六橋村仍依舊次不紊梅花塢在第六橋北近孤山處賈似道築水竹院落架樓臨之稱曰第一春梅塢竹素園在第六橋西○國朝雍正九年總督李公衛闢地爲園正中建堂奉○○○世宗御書竹素園三字爲額右引桃溪之水屈曲環注倣古人流觴之意臨水構亭亭西置舫齋曰臨花舫迤南爲水月亭後爲樓曰聚景最後爲觀瀑軒爲香泉室湖上泉流之勝此爲最著湖山神廟在竹素園左雍正九年與園同建李公記略曰河圖括地志言川德布精上爲星西湖之勝豈獨無列宿主之又典術東方歲星爲杏春秋運斗樞玉衡之星散而爲桃草木之敷英皆列宿之精所化西湖自正月至十二月無月無花無花不盛亦必有主之者已爰闢祠宇中奉湖山正神旁列十一月花神加以閏月各就其月之花表諸冠裳以爲之識且設四時催花使者於湖山神之旁焉三春之月都人士女競集於此畫

鼓靈簫喧闐竟日目曰湖山春社一

裏湖有金沙港其旁爲趙公隄有天澤廟

舊有趙院杜叔謙宅小隱園國院宋廟齊墓裴園螭橋

接趙隄爲金沙隄有玉帶橋闕

帝祠與一隄縱橫相值者爲楊公隄有裏六橋

金沙港咸淳臨安志云金沙澗遶靈隱山一帶至行春

橋折入步司前軍寨門由趙院流入湖雲麓漫鈔謂武林東西二水東曰龍源西曰錢源合流過橫坑橋

入於錢湖蓋卽此也澗水入湖之處名金沙港顧夷吾山川記云其水自南徂東臨浙江一派謂之靈隱

浦臨安志引之云今資國院前是也亦云靈隱步頭顧氏所謂靈隱本統湖上羣山言之其浦指湖江相

輸之處唐後湖不通江而自九里松行春橋至金沙港皆爲靈隱寺所屬故自宋以來皆指此港爲靈隱

浦其港沙皆金色又名金溪元虞集構金溪草堂於此見姚氏西湖志白琰結廬港畔又名之曰淇園著

有淇園集見宋潛溪文集地屬南北兩高之間又名兩峰澗見武林舊事是處山泉深會砂礫擁流湖面

最易淤塞○國朝雍正五年設建石閘港口 趙公隄一名小新隄宋淳祐二年安撫趙德淵與憲築自

北新路第二橋至趙院步凡二百五十丈夾岸花柳一如蘇隄路通靈隱天竺平隄作四面堂又作亭三

以憩遊人咸淳五年修築增高五尺廣皆二十五尺傅氏志纂云此隄湮沒已久故隄旁諸園在嘉靖間

作遊覽志時已稱並廢宋志所云北路第二橋蓋東浦橋也今新築之金沙隄卽其處竊按履泰將軍廟

武林舊事系小新隄下今廟現存以此測之似隄未全湮金沙隄但續其東陲數十丈耳 天澤廟在小

新隄去金沙隄西約一里一名履泰將軍廟將軍孫顯忠字贊明仕吳越宋嘉熙中京尹趙與懽禱雨有

驗奏封天澤侯賜廟額曰孚應額及省牒皆與懽手書明萬歷間郡守張振之禱雨復驗拓地新廟郡丞

喻均爲記廟有天澤井禱雨臺葛仙翁所植虬松其左爲魚籃觀音院 金沙隄雍正九年總督李公衛

因港中灘沙漲成平陸就築成隄以通裏六橋路與蘇隄之東浦橋縱橫相接廣三丈長六十三丈隄半

爲玉帶橋此隄之長僅趙隄四分之一自此西通行春橋路百七十七丈則猶趙公故蹟也 玉帶橋中設三洞鹽水上構飛亭夾以朱欄繞以花柳晴波倒影儼然長虹互空增修十八景目曰玉帶晴虹 關帝祠在玉帶橋側雍正九年建湖上祠凡數處規制宏麗以此爲最由正殿迴廊啟徑而入疊爲石山疏泉爲池錯置亭榭有觀瀾亭垂釣亭蓄薇洞瓊花島及月榭露橋岑樓船室諸勝 楊公隄在襄湖西岸與蘇公隄相對明正德初郡守楊溫甫孟瑛既開濬西湖遂於此築隄建橋所謂裏六橋是也今裏湖淤淺隄西多爲居民田桑之地行遊者稀雍正間修隄但增高闊不復補植花木 裏六橋遊覽志云近北三橋宋已有之楊公所築特南山三橋耳其名不立今擬定之第一橋近淨空院玉泉之水出焉題曰環碧自此而西可通耿家步第二橋金沙灘水出焉題曰流金自此而西可通麴院路第三橋近龍潭深窵莫測時有祥光浮水蓋神物之窟宅也題曰臥龍自此而西可通茅家步第四橋遶丁家山而東沿隄屈曲蒼翠掩映題曰隱秀自此而西可通花家山第五橋西挹高峰舊有三賢祠在焉題曰景行自此而西可通麥嶺路第六橋從定香橋而入虎跑珍珠二泉之水出焉其源長矣非濬道不可題曰濬源以上諸名皆田汝成所擬考郎瑛七修類稿載楊公嘗自言云南畔三橋乃吾新開之地可名爲濬復濬源濬治北畔三橋舊有水口吾爲築橋可名爲一龍流金涵玉據此則楊公本自立名且近北三橋亦非宋所有矣杭人并蘇隄六橋稱十二橋

外湖有湖心亭

舊有三塔三潭湖心詩社

南爲放生池爲三潭印月亭

舊有水心保甯寺

湖心亭湖中舊有三塔明宏治時

毀正德時并去其基惟北塔一基略存嘉靖三十一年知府孫孟訪得之建亭其上名曰振鷺田藝蘇遊

記由涵鏡亭西渡湖心爲振鷺亭是也未幾圯萬曆四年按察僉事徐廷祿重建額曰太虛一點司禮孫

隆疊石四周廣其址建喜清閣旁植花柳遊人詞客但統稱曰湖心亭○國朝重加葺治左右翼以雕欄